



Bainbaud pon ins guardar live tge che curra e passa en il cussegl grond a Cuira.

## A partir d'avust il cussegl grond er en stiva

■ **(anr/fa) Cun 105:3 vuschs e senza debatta ha il parlament grischun acceptà il project concernent la transmissiun a temp real da las sessiuns dal cussegl grond. Las sessiuns d'avrigl e zercladur servan per far ils tests en chaussa.** L'impuls per transmetter las sessiuns dal cussegl grond «live» per in e mintgin aveva dà l'intervenziun da *Conradin Caviezel* da l'atun 2015. El aveva scrit ch'i fiss da procurar che las debattas dal parlament a Cuira sajan publicas, era per quellas e quels ch'abitavan en regions periferas. Quest live-streaming vegniva purschi da quel temp gia da la confederaziun e da plirs chantuns. Render accessibla la politica ad in pli grond public signifitgia, sco ch'el aveva argumentà, la schanza che dapli glieud s'engaschia politicain. Quai aveva persuadì la maiortad dal parlament grischun. Al cumenzament da favrer 2016 aveva il cussegl grond, cun 83 cunter 22 vuschs e naginas abstenziuns, declarà relevanta la proposta Caviezel. Sco cumissiun predeliberanta è vegnida incumbensada la conferenza dals presidents. Mesemna ha pre-

schentà il president *Martin Aebli* (pbd, Engiadin'Ota) il project: «Per custs da 75 000 francs duai, sch'il parlament accepta il project, vegnir installada l'infrastructura necessaria per las transmissiuns a temp real da nossas debattas.» Durant las sessiuns d'avrigl e da zercladur vegni fatg differents tests per vesair sch'il sistem sa verifitgescha e nua ch'ins pudess anc al optimar. «Durant quellas duas sessiuns na vegnan las debattas anc betg transmessas ed er uschiglio funcziuna il manaschi dal parlament sco usità», ha ditg Aebli, «pir la debatta d'avust vegn a vegnir transmissa per l'emprima giada via live-streaming.» Il cussegl grond ha decis, senza debattar surlonder, ch'il temp per questa novaziun tecnologica saja madi: Cun 105 cunter trais vuschs e naginas abstenziuns ha approvà il parlament la proposta da la cumissiun predeliberanta, la conferenza dals presidents. Per introducir questa transmissiun a temp real na dovri nagina nova basa legala: «Per las sesidas dal parlament exista en Grischun gia uss il princip da trasparenza.»